



ՀՅՈՒՍԻՍԱՅԻՆ ԱՄԵՐԻԿԱՅԻ ՀԱՅՈՑ ԱՐԵՎԵԼՅԱՆ ԹԵՄԻ ԱՌԱՋՆՈՐԴ ԳԵՐԱՇՆՈՐԸ Տ. ՄԱՄԲՐԵ ԱՐՔԵԱԿԻՍԿՈՊՈՍ ԳԱԼՖԱՅԱՆԸ ԹԻԼԻՍԻՈՒՄ

Հոկտեմբերի 18-ին, ուրբաթ օր, գերաշնորհ Տ. Մամբրե արքեպիսկոպոս Գալֆայանը հովվական այցելության մեկնեց Թբիլիսի։ Սրբազան հոր ընկերակցում էին հոգեշնորհ Տ. Հայրիկ վարդապետ Ավետիսյանը և բարեշնորհ Սարգիս, Կարապետ և Խորեն սարկավազները։

Հոկտեմբերի 19-ին, շաբաթ օր, առավոտյան ժամը 9-ին, գերաշնորհ սրբազան հայրը գնացքով հասավ Թբիլիսի։ Վրահայոց թեմի առաջնորդ հոգեշնորհ Տ. Կոմիտաս վարդապետ Տեր-Ստեփանյանի, թեմի քահանայական դասի և թեմական խորհրդի անդամների առաջնորդության մեր սրբազանը ուղղվեց Թբիլիսի հայոց Ս. Գևորգ եկեղեցին և «Հրաշափառ»-ով մուտք գործեց տաճար, տեղ հավաքվել էր հավատացյալ ժողովրդի մեծ բազմություն։ Առաջնորդ հայր սուրբը, հանուն վրահայոց թեմի հավատացյալների և եկեղեցական դասի, բարի գալստյան սրտագին և ջերմ խոսք ուղղեց Մամբրե արքեպիսկոպոս Գալֆայանին։ Սրբազանը եկեղեցում իր ուխտը կատարելուց հետո խորին շնորհակալություն հայտնեց հոգեշնորհ Տ. Կոմիտաս վարդապետին ջերմ ընդունելության համար։ Նրեկության սրբազանը նախագահեց կիրակամտի ժամասացությունը։

Հոկտեմբերի 20-ին, կիրակի օր, Թբիլիսիի Ս. Գևորգ եկեղեցում հանդիսավոր սուրբ պատարագ մատուցեց գերաշնորհ Տ. Մամբրե արքեպիսկոպոս Գալֆայանը։ Նկեղեցին լիքն էր հավատացյալներով։ Բարեպաշտ հայ հասարակությունը շտապել էր եկեղեցի՝ սրբազան հոր օրհնությունը ստանալու համար։

Գերաշնորհ Տ. Մամբրե արքեպիսկոպոս Գալֆայանը սուրբ պատարագի ընթացքում կատարեց քահանայական շնորհաբաշխություն։ Նա քահանա ձեռնադրեց Հոգևոր Ճեմարանից շրջանավարտ շնորհունակ Հովհաննես սարկավազ Դանիելյանին։ Վաղուց է Թբիլիսիի հավատացյալ ժողովուրդը ներկա չէր եղել ձեռնադրության Ս. Խորհրդի կատարման։ Այդ օրը անմոռանալի պիտի մնա Թբիլիսիի հայերի հիշողության մեջ։ Նորընթան անվանվեց Տ. Հովհաննես քահանա։ Ձեռնադրիչ սրբազանը, շնորհաբաշխության հուզիչ արարողությունից հետո, գեղեցիկ և բովանդակալից քարոզ խոսեց «Բազումք են կոչեցեալք, այլ սակաւք են ընտրեալք» բնաբանով և հայրական հորդորներ տվեց նորընծա Տ. Հովհաննես քահանային՝ օրինակ լինել հոտին «բանիւք, գնացիւք, հաստովք»։ Սրբազանի քարոզը խոր տպավորություն թողեց բոլորի վրա։ Քարոզի վերջում սրբազանը կոչ արեց հավատացյալներին՝ սիրով և հոգատարությամբ շրջապատել միշտ մեր Մայրենի հարազատ Նկեղեցին, նախանձախնդիր լինել նրա պայծառության համար։

Սուրբ պատարագից հետո գերաշնորհ Տ. Մամբրե արքեպիսկոպոս Գալֆայանը, հոգեշնորհ Տ. Կոմիտաս վարդապետի ընկերակցությամբ, այցելեց Վրաստանի գեղեցիկ մայրաքաղաք Թբիլիսիի տեսարժան վայրերը։ Նրկուշաբթի օր, հոկտեմբերի 21-ին, սրբազանը վերադարձավ Մայր Աթոռ, Թբիլիսիից իր ստացած լավագույն տպավորություններով։

